



GUBITNIK NEDJELJE GORAN SALIHOVIĆ, GLAVNI TUŽILAC BiH

Optužnica raskrinkava Tužilaštvo kao filijalu bošnjačkih stranaka i do juče nedodirljivih pojedinaca u tim strankama, koji nemaju drugog načina da izbjegnu pravdu osim da Tužilaštvo upotrijebe kao instrument, kaže Košarac

I do sada smo bili svjedoci da je bilo postupaka koji su vođeni, a nije ih bilo potrebno voditi, a ova zemlja plaća mnogo novca za hapšenja koja su bila neosnovana, rekao Čolak

Privatni rat!



Optužnica protiv Gorana Zupca, prvog čovjeka SIPA, motivisana je isključivo privatnom netrpeljivošću koju prema direktoru Agencije za istrage i zaštitu ima Goran Salihović, glavni tužilac BiH, ocjena je mnogih pravnika.

Konkretno, sukob između Zupca i Salihovića datira otkako je SIPA uhapsila Šemsudina Mehmedovića, poslanika SDA, zbog zločina nad srpskim stanovništvom u Tešnju.

Nemalo nakon hapšenja, nakon čega je uz izvještaj predat Tužilaštvu BiH, Salihović je Mehmedovića pustio na slobodu.

Zubac je tada podnio prijavu VSTS protiv Salihovića zbog opstrukcije u predmetu "Mehmedović", što je i logičan slijed događaja imajući u vidu dokaze koji postoje protiv aktuelnog poslanika SDA.

Upravo od podnošenja prijave traje netrpeljivost Salihovića prema Zupcu, koji je, kako saznajemo, samo čekao povod da se osveti.

- Međutim, našao je više nego smiješan povod, jer je sasvim jasno da

njegovi navodi ne stoje. Zna se ko je odgovoran za obezbjeđivanje objekata - navode pravnici.

Mehmedović je uhapšen sredinom prošle godine zbog osnovane sumnje da je počinio ratne zločine protiv srpskog stanovništva na području Tešnja.

Pripadnici SIPA deset mjeseci provodili su istragu u okviru akcije kodnog imena "Ozren". Mehmedović je osumnjičen da je na području Tešnja od proljeća 1992. do jeseni 1993. godine, dok je obavljao funkciju načelnika CJB u Tešnju, počinio zločine protiv srpskog stanovništva.

Tužilaštvo BiH upravo je zbog toga prije nekoliko dana podiglo optužnicu protiv Gorana Zupca, zbog, kako je navedeno, nesavjesnog rada u službi.

Optužnica, koju je potvrdio Sud BiH, odnosi se na to da se Zubac, navodno, oglušio na zahtjeve za pomoć u obezbjeđenju zgrade Predsjedništva BiH tokom demonstracija u Sarajevu koje su održane u februaru ove godine.

Ranije su iz SIPA isticali da obez-

bjeđenje javnog reda i mira nije u njihovoj nadležnosti, već federalnog i kantonalnih MUP, u ovom slučaju policije Kantona Sarajevo. Inače, nadležnost obezbjeđenja zgrade Predsjedništva BiH i svih bh. institucija u rukama je Direkcije za koordinaciju policijskih tijela BiH.

Staća Košarac, zamjenik predsjedavajućeg Doma naroda, poručio je da će srpski predstavnici u zajedničkim institucijama iskoristiti sva pravna i politička sredstva kako bi zaustavili prljavu političku namjeru Tužilaštva BiH i bošnjačkih političkih šefova da diskredituju i sa pozicije direktora SIPA uklone Gorana Zupca.

- Optužnica Tužilaštva BiH protiv Zupca je pročitana knjiga. Ta optužnica raskrinkava Tužilaštvo kao direktnu filijalu određenih bošnjačkih stranaka i do juče nedodirljivih pojedinaca u tim strankama, koji nemaju drugog načina da izbjegnu pravdu osim da Tužilaštvo BiH upotrijebe kao instrument za realizaciju svojih ciljeva. Glavni tužilac, Goran Salihović, lutka je na koncu tih bošnjačkih stranaka i tih pojedinaca i zbog toga hitno treba da podnese ostavku i da ode s te pozicije - upozorio je Košarac.

On je podsjetio da je SIPA pod vodstvom Zupca uspješno provela najobimnije istrage u istoriji BiH protiv mafijaških klanova, nakon kojih je uhapšeno i procesuirano više desetina kriminalaca i ubica.

- Problemi su nastali nakon što je otvoren jedan broj predmeta ratnih zločina protiv Srba, koji su godinama sakupljali prašinu. Imena osumnjičenih dobro su poznata javnosti, jer je riječ o Bošnjacima koji se danas nalaze na nekim od ključnih političkih, policijskih, pa čak i pravosudnih funkcija. Svi oni očekivali su i očekuju pomoć i zaštitu Gorana Salihovića - upozorio je Košarac.

✉ M. K.